

## **Inyarubha ya Yuuda Ubhukangati**

Inyarubha yinu yandikirwi na Yuuda, umwabha Yaakobho. Bhabhiri bhayo bhaari bhanyi bha Umukuru Yisu. Yuuda akaandika inyarubha yinu iguru wa abhaatu bhusi.

Yuuda akeenda kwandika inyarubha yinu, korereke agambi iguru wi ing'ana yubhusabhuri. Nawe kuring'aana na amang'ana obhorebhe ganu gaari mamasengerero ga zisiku ziyo, akahama Abhakiriisitu iguru wa amiija gu ururimi. Arabhabhurira bhaangi amiija ga abhiija bha ururimi bhanu bhaari bhasikiiri kwa mbisi gati waabha. Abhiija bhayo bhaari bharii, Abhakiriisitu bhang'ehe kokora ubhubhi, ku kubha ubhutuurya bharabhoneka kubhigangi bhya Mungu. Na bharaanga umukangati umukuru Yisu Kiriisitu. Yuuda aragambira ebherenjo bhyu Ubhuragi bhwu ikari kukandikija Abhakiriisitu, bhang'ehe kugwata amaheene iguru wa Mungu ni ing'ana Inzamu iguru wa Yisu, chimbu bhiigwiri kurwa kubhatumwa bha Yisu.

### *Amakeeren'ya*

<sup>1</sup> Inyarubha yinu nandikiri inyi Yuuda, omohocha wa Yisu Kiriisitu, na ni-umwabha Yaakobho. Nirabhaandikira imwi bhanu mwabhirikiirwi na Bhaabha Mungu, musigirwi nawe, na kuriibhwa bhwaheene iguru wa Yisu Kiriisitu.

<sup>2</sup> Mungu abhoongere ibhigangi, omorembe na abhusigi.

*Itinira kubhija bha ururimi*

<sup>3</sup> Abhasigwa bhaani, nikiigomba bhakung'u nibhaandikiri iguru wu ubhutuurya bhanu bhukugwatan'ya itwasi hamwimwi. Nawe, niruzi iranyenda nibhaandikiri inyarubha yinu kubhiisasaama muhizaniri mumaheene gu ubhwisirirya bhanu Mungu ahurukiryi kubharindu\* bhaazi, rumwibhu kwibhaga ryasi.

<sup>4</sup> Nirabhaandikira inyarubha yinu ku kubha kuna abhaatu obhorebhe bhanu bhatakwigwa Mungu, bhiisikiiryi kwa mbisi gati waanyu. Ebho bharachara ing'ana yi ibhigangi bhya Mungu wiitu korereke abhaatu bhakore amang'ana ga zisuni na bharaanga Yisu Kiriisitu, Umukangati umumwimwi na Umukuru wiitu. Nawe yandikirwi kwima ikari, abhaatu bhayo bharatinirwa, chimbu abhandi bhanu bhaamariri kutinirwa.

<sup>5</sup> Nangabha mwizi ganu gusi, nereenda kubhahiitya kubha, Umukuru akatuurya Abhiizirairi kurwa mucharu cha Miisiri, nawe hanu aamariri, akaricha bhanu bhaangiri kumwisirirya.†

<sup>6</sup> Muhiiti bhamaraika‡ bhanu bhatiisirwi na ubhugungu bhwabhu, bhakatiga ubhwikari bhwabhu, Mungu abhabhahiri mukiirimya ikiritu ne emenyororo iminagu. Bhararinda urusiku urukuru rwu ukutinirwa.

\* **1:3 Abharindu.** Kumaragirira bhakung'u, rora Ikiniibhasa.

† **1:5** Rora Ukubhara 14:26-35, 26:64-65. ‡ **1:6 Bhamaraika.** Kumaragirira bhakung'u, rora ring'ana maraika muKiniibhasa.

<sup>7</sup> Muhiiti naatu ganu gaabhwini abhaatu bha Sodom na Gomora, na zimbi za haguhi. Bhakakora ubhwangi chimbu bhamaraika bhaakuriri. Bhaari bharakora ikisimbi na kutuna umwuyu gwu umubhiri ganu gutatuubhini na chimbu bhaabhumbirwi. Mungu akabhatinira kwochwa no omorero gwa kemerano, korereke ibhi amiija kubhaatu bhusi. §

<sup>8</sup> Ibhhu nimbu bhari abhaatu bharya bhatakwigwa Mungu. Ebherooto bhyabhu bhihaagirya bhabhenge imibhiri jabhu, korega ubhutimi bhwa Mungu na kutuka ibhityinyi ibhirindu bhina bhiri mwisaaru.

<sup>9</sup> Nuru Mikairi maraika umukuru na Shitaani,\* hanu bhahakaaniri ikitundu cha Musa, Mikairi ataagimiri kutinira Shitaani kwa kumariririra. Nawe akamubhurira, "Umukuru akoreche!"

<sup>10</sup> Hanu abhaatu bhayo bhahaatuka ibhityinyi bhiyo, bhahaabha bhatabhyizi. Bhahaarichwa kumang'ana ganu bhagizi kwima simuka, nchi ibhityinyi bhina bhitaana amang'ini.

<sup>11</sup> Horeera ebho, ku kubha bhatuniri inzira ya Kaini.† Bhiisikiiryi mumakangirirya ncha Bharaamu, iguru wu ukwenda ubhuniibhi.‡ Bhararika, chimbu Koora aangiri, akarika. §

<sup>12</sup> Abhaatu bhayo bhaangi amatar amabhi manyanza.\* Hanu bhahaarya na niimwi muzisigukuru zaanyu zu ubhusigi,

§ **1:7** Rora Ubhutangi 19:1-26. bhukung'u, rora Ikiniibhasa.

\* **1:9 Shitaani.** Kumaragirira  
† **1:11** Rora Ubhutangi 4:1-16.

‡ **1:11** Rora Ukubhara 22-24, 31:16. § **1:11** Rora Ukubhara 16:1-35.

\* **1:12 Amatar amabhi manyanza,** ubhagaruri ubhandi bharatara kubha, makarabhara.

bhahiiyangerira abheene, bhataana suni. Bhataana nzobhooro, bhatuubhiini na amasaaru ganu gataana imbura, gahaanyaraganibhwa nu amakama. Ebho ni-miti ginu gitaana imisumu ribhaga rya amagesa, jumiri, na gigwiri.

<sup>13</sup> Abhaatu bhayo bhaangi amakunda amakuru ga manyanza, na amang'ana gaabhu ga zisuni garanyaragana ncha rihuru rya amakunda. Bhatuubhiini na zenzota zinu zikwereera. Ahagero hi ikiirimya ikiritu nyaari, habhuri bhwaheene iguru waabhu kameranu.

<sup>14</sup> Inuki, amuntu wu urwibhuru rwa muhungati kwima kwa Adaamu† akarootorera iguru wa abhaatu bhayo, “Rora, Umukuru araaza hamwimwi ni ibhikwi bhya bhamaraika bhaazi.

<sup>15</sup> Aratinira abhaatu bhuusi na kuhiinya bhuusi bhanu bhatakwigwa Mungu, ku mahocha gaabhu guusi amabhi, ganu bhaakuriri, bhataadiiriiri Mungu, ni iguru wa amang'ana amabhi guusi ganu bhu ubhubhi bhaatukiri Mungu.”

<sup>16</sup> Abhaatu bhayo bhakwibheerya na kuriririra, bharatuna imyuyu jabhu imibhi. Bhahaaruusha amang'ana gu ukurugura kubhwindi bhwu uku-ruta nu ukuchura amang'ini ga abhaatu korereke bhiibhonere abheene.

### *Amaangirijū nu ubhutangiri*

<sup>17</sup> Nawe imwi abhasigwa bhaani, muhiiti ganu abhatumwa‡ bhu Umukuru wiitu Yisu Kiriisitu bhaagambiri ikari.

† 1:14 Rora Ubhutangi 5:21-24.

‡ 1:17 **Abhatumwa.** Kamaragirira bhakung'u, rora ikiniibhasa.

18 Bhaari bharabhuga, “Zisiku zi itiniru karabhoneka abhaatu bhe ekerege, bhanu bhakutuna imyuyu jabhu imibhi.”§

19 Abhaatu bhayo bharareeta ubhutaaman'ya, bhariiseega amang'ana ga kusi ageene, bhataana Ekoru ya Mungu.

20 Nawe imwi abhasigwa bhaani, kwa kwinaja mubhwisirirya bhwanyu ubhurindu bhukung'u, ku kusabha kubhuna bhw Ekoru Indindu.

21 Mubhi muriiribha mubhusigi bhwa Mungu. Na mararinda ibhigangi bhyu Umukuru wiitu Yisu Kiriisitu, korereke bhimbahi ubhuhuru bhwa kemerano.

22 Mubharorere ibhigangi abhaatu bhanu bhanu uruhaho.

23 Na abhandi mubhasabhuri ku kubhasaakura kurwa momorero gwa kemerano. Abhandi mubharorere ibhigangi, nawe mwiyangariri, na mwibheze ubhumbi bhwabhu.\*

### *Amasabhi gu ukukumya*

24 Mungu newe akutara kubhariibha korereke mutabhura, na kubhareeta imwi mubhugungu bhwazi, mono obhozomerwa na kutaana isoro ryuryusi.

25 Ewe ni-Mungu umwene, Umusabhuri wiitu kuhitira Yisu Kiriisitu Umukuru wiitu. Akumibhwi bhukung'u ku kubha anu ubhugungu, anu ubhukuru, ana amanaga, anu ubhuna, kwima ikari, nangwinu na kemerano. Garami.

---

§ 1:18 Rora 2 Peetero 3:3. \* 1:23 Mwibheze ubhumbi bhwabhu kuKigiriki ni mubhihirirwi nuru amibhoho gaabhu ganu gatuuri-irwi ubhubhuruuru bhwa inamba yaabhu imbi.

**Ubhuragi Ubhuhya Mukigambũ chi Ikikiizũ  
Ikizu: Ubhuragi Ubhuhya Mukigambũ chi Ikikiizũ (New  
Testament+) for Tanzania**

copyright © 2024 Wycliffe Bible Translators, Inc.

Language: (Ikizu)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

---

PDF generated using Haiola and XeLaTeX on 3 May 2025 from source files dated 3 May 2025

cfe4772f-9f09-59a0-b72b-3863d6657553